

Tervetuloa Malmön Moderna Museethiin

Joulukuusta 2009 alkaen Moderna Museet on kahessa paikassa – Stokholmissa ja Malmössä. Malmön Moderna Museet on saanu paikan yhen Malmön kaunhiimista rakenuksista, John Smedbergin sähkölaitos vuela 1901. Se on saanu moderniman, oransjin lisärakenuksen josta on tullu Malmön Moderna Museetin tunnusmerkki.

Malmön Moderna Museetissa ei näytetä yhtään permanenttia näyttelyä, sen eestä sie saatat vierailijana kohata ruottalaista ja kansanvälistä nykyaijan taitheen sekotusta. Sen lisäksi tarjoothaan jatkuvasti osia Moderna Museetin rikhaasta kokoelmista, jossa avvainteokset on modernia ja nykyaijan taitetta 1900-luvulta ja myöhäisempää.

Oransjikasteltussa sisäänkäynnissä sie saatat sulattaa sinun kokemukset fiikan eli keveän lynsjin kans. Täälä on kans pienempi myseymmikauppa. Sen lisäksi tarjoama toimintoja pienile ja suurile sekä prukrammitarjonta missä on muun muassa luentoja ja taiteilijanesittelyitä.

Tervetuloa Malmön Moderna Museetin fantasttishiin taijekokemukshiin!

Avvoimet näyttelyt

Seurata meän taitavitten opastajitten kans näyttelyssä on erinomhainen malli lähestyä taijetta. Malmön Moderna Museet tarjoaa monenlaisia esittelyitä meän aijankohtaisista näyttelyistä.

- **Opastetut näyttelyt:** Joka lauantai kl 15 (Huomaa! Ruottiks).
- **Opastetut näyttelyt arabian kielelä:** ensi pyhä joka kuukausi kl 15.

Lapsile ja & raahvaile

- **Perheenäyttelyt:** esittely suurile ette pienile, missä on suurta tillaa kysymyksile. Annethaan jokaisen kuukauen toiseks viimisen pyhän aikana kl 13. (4 vuesta ja ylös).
- **Beipinäyttelyitä:** Näyttely tapahtuu rauhalisessa vauhtissa missä beipikset (0-15 kuukausia) päättävät tahtia. Päivile ja aijoile katto kotisivua.
- **Perheeverstat:** avoin versta missä on inspirasjuunia käynnissä olevista näyttelyistä. Annethaan joka kuukauen viimisenä pyhänä, drop-in kl 11.15-15. (4 vuesta ja ylös).
- **Lupaverstat:** avoin versta lapsile koululuvitten yhteyvessä. Päivile ja aijoile katto kotisivua. (4 vuesta ja ylös).
- **Taijeavvaimia ja tippikieroksia:** hauskat petakookiset neuvot on lainattavana resepsjuunissa kun ei ole käynnissä yhtään verstatoimintaa.
- **Kielikieros:** petakookinen materiaali sovitettu raahvoile jotka opiskelevat ruottia. Kieroksessa saapi maholisuuen oppia eri asioista Malmön Moderna Museetistä, samala kun oppii taitheesta.

Käytettävyys

- Vammaistentualetti.

- Rullatooli lainettavana.
- Ei yhtään estävää kynnystä myseymmissä. Hissi kerroksitten välillä.
- Hoituhuone hoitopöyvän kans.
- Entreekassala on kuulolanka.

Ajateltavaa vierailun aikana meän tykönä

- Nauti ja saa inspirasjuunia taitheesta! Jos sulla on kysymyksiä eli haluat keskustella taitetta, ota mielelhään yhteyttä meän myseymmiväärtien kans.
- Ei ole lupa koskea taiteteokshiin, pieni sormi saattaa valitettavasti vahinkoittea taiteteoksen pintaa.
- Kuvvaus on hyväksytty näyttelysalissa, mutta älä käytä blikstiä eli selfipinnaa.
- Näyttelysalissa ei ole lupa puhua mobiilitelefoonissa.
- Laukkua ei saa kantaa selässä, vain käessä eli vattan päälä. Paraplyytä ei saa ottaa mukhaan näyttelysalhiin.
- On olemassa lukitettavia säilytyskaappia, ilman rahamyntin tarvetta, sinun kampeille.
- Ruokaa ja juomaa mennee ostaa kahvilassa, mutta ei saa ottaa mukhaan näyttelysalhiin. Valitettavasti ei ole paikkaa missä saattaa syöä ommaa ruokaa mitä on itte ottanu matkhaan.

Vierailuatressi

Ola Billgrens plats 2-4, Malmö

Malmön Moderna Museet on keskelä Malmötä. Kymmenen minuutin kävelymatka sentraaliasemasta, viis minuuttia Gustav Adolfs torgilta ja Stortorgetista.

Lähhiin byssipysäke on Lääninhallitus, Caroli, Djäknegatan ja Studentgatan.

Aukiaijat

Tiistai-perjantai: 11-18, lauantai-pyhä: 11-17

Maanantaisin kiini

Sisäänpääsymakso

Malmön Moderna Museethiin on aina ilmhainen pääsy.

Kontakti

Telefooninnumero: 040-685 79 37 (palvelussa kl 11-18)

Väkseli: 08-52 02 35 00

Meili: info.malmo@modernamuseet.se

Seuraa meitä sosiaalisissa meetioissa

Facebook: ModernaMuseetMalmo

Instagram: @ModernaMuseetMalmo

Twitter: @ModernaMalmo

MODERNA MUSEET

www.modernamuseet.se